



唐大詔令集卷第五

帝王

改元下

改元建中勅

奉天改興元元年赦

改元正元并招封河中李懷光准西李希烈赦

改元元和赦

改元大和赦

改元開成赦

改元廣明赦

改元天復赦

改名

武宗改名詔

改元下

改元建中元年勅



勅春秋有五色之統蓋王者踰年建号躰元居正上以繼業及始下以書事布策示不忍有變於中年也朕以不造銜恤在疚而三事大夫迫至公之命踰大孝之道實奪予哀為衆所戴恐墜祖宗之遺烈不若先帝之前訓如履薄霜如乘奔失御濡露之感忽焉歲初罔極之懷瞻天靡及舊物未改常典惟新勉而從之良增感奉其以大曆十五年改為建中元年所司准式庶協履端於始載符皇極之義也

奉天改元中五年為興元元年正月一日赦

陸贄

門下致理興化必在推誠忌已濟人不老改過朕嗣服丕構君臨万邦失守宗祧越在草莽不念率惠誠莫追於既往永言思咎期有補復於將來明徵厥初以示天下惟我烈祖邁德庇人致俗化於和平拯生靈於塗炭重熙積慶垂二百年伊尔卿尹庶官洎億兆人衆代受亭育以迄于今功存於人澤垂於後肆予小子獲纘鴻業懼德不嗣罔敢怠荒然以長於深宮之中暗於經國之務積習易溺居安忘危不知稼穡之艱難不察戍役之勞苦澤靡下究情不上通事既壅隔人懷疑

阻猶昧省已遂致用興戎徵師四方轉餉千里賦車籍馬遠近騷然行賈居送衆庶勞苦或一日屢交鋒刃或連年不解甲冑典祀之主家室靡依死生流離怨氣凝結力役不息田萊多荒暴命峻於誅求疲賦空於杼軸轉死溝壑離去鄉里邑里丘墟人烟漸絕天譴於上而朕不悟人怨於下而朕不知馴致亂階變興都邑賊臣乘隙肆逆滔天曾莫愧畏敢行凌逼万品失序九廟震驚上累于祖宗下負于衆庶痛心覲面罪實在予永言媿悼若墜泉谷賴天地降祐人神叶謀將相竭誠爪牙宣力屏逐大盜載張皇維將弘丕猷必布新令朕晨興夕惕惟念前非乃者公卿百寮頻抗章表猥以徽号加于朕躬固辭不獲俯遂輿議昨因內省良用矍然躰陰陽不測之謂神與天地合德之謂聖願惟淺昧非所宜當文者所以化成武者所以定亂今化之不被亂是用興豈可更徇群情苟膺虛美重予不德祇益懷慚自今已後中外所上書奏不得更稱神聖文武之号夫人情不常繫於時化大道既隱亂獄滋豐朕既不能弘道惠人又不能一法齊衆苟設密網以為羅非辜為之父母寔增愧悼今上元統曆獻歲發生宜革紀年之号式敷在



宥之降與人更始以答天休可赦天下改建中五年為興元元年自正月一日昧爽已前大辟罪已下罪無輕重已發覺未發覺已結正未結正繫囚見徒常赦所不原者咸赦除之李希烈田悅王武俊李納等有以忠勞任膺將相有以勲舊繼守藩維朕撫馭乖方信誠不著致令疑懼不自保安兵興累年海內騷擾皆由上失其道而下罹其灾朕寔不君人則何罪屈已弘物予何愛焉庶懷隱匿之誠以洽好生之惠其李希烈田悅王武俊李納及所管長將士官吏等一切並與洗滌各復爵位待之如初仍即遣使諸道宣諭朱滔雖與賊泚連坐路遠未必同謀朕方推以至誠務欲弘奉如能効順亦與惟新其河南河北諸軍兵馬並宜各於本道自固封疆勿相侵軼朱泚大為不道弃義滅息及易天常盜竊名器暴犯陵寢所不忍言獲罪祖宗朕不敢赦其應被朱泚脅從將士官吏百姓及諸色人等有遭其扇誘有追於亮威苟能自新理可矜宥但官軍未到京城已前能去逆効順及散歸本軍本道者並從赦例原免一切不問天下左降官即與量移近處已經量移者更與量移流入配隸罰鎮効力并宥罪犯與諸使駁使官與別州縣安置

及得罪人家口未許歸者一切放還應先有痕累禁錮及反逆緣坐承前恩赦所不該者並宜洗雪亡官失爵放歸勿盡者量加收叙人之行業或未必兼構大厦者方集於羣材建奇功者不限於常檢苟在適用則無棄人况黜免之徒沉鬱頗久朝過夕用勿拘常例諸軍諸道赴奉天及進收京城將士等或百戰摧敵萬里勤王得固金城駭除大憝濟危難者其節著復社稷者其業崇我圖爾功特加異典錫名疇賦永永無窮宜並賜名奉天定難功臣身有過犯並減罪三等子孫有過犯並減罪二等本戶應有差徭使役一切蠲除其功臣已后雖衰老病患不任軍旅當分糧賜並宜全給身亡之后十年內仍回給家口其有定食封者子孫相繼代代無絕其餘收錄及功賞條件待收歸日並依去年十月七日十一月十四日勅處分諸道諸軍將士等久勤扞禦累著勲方鎮克寧惟爾之勳其應在行營者並超三省與官仍賜勲五轉不離鎮者依資與官賜勲三轉其累加勲爵仍許回授周親内外文武三品已上賜爵一級四品已下各加一階仍並賜勲兩轉見危致命先哲攸貴掩骼埋胔禮經所先雖効用之或殊在惻隱而何間諸道將士有死王事者各委所在州縣給通送赴本管官為葬祭具有因戰陣殺戮及捕獲伏辜暴骨原野



者亦委所在逐近使殯葬應泐流貶及犯罪未葬者並許其家各據  
本官品以禮致奠自頃軍旅所給賦役繁興吏因為姦人不堪  
命咨嗟怨苦道路無聊况可小康與之休息其墊陌及稅間架竹木  
茶漆榷鐵等諸色名目悉宜停罷京畿之內屬此寇戎攻劫焚燒靡  
有寧室王師仰給人以重勞宜特簡放今年夏稅之半朕以兇醜犯  
闕遽用子征爰度近郊悉駕茲邑供儲克辦師旅攸寧式當褒旌以  
志吾過其奉天宜升為赤縣百姓並給復五年向惠者教化之所先  
求賢者邦家之大本永言茲道夢想勞懷而澆薄之風趨競不息幽  
棲之士寂寞無聞蓋誠所未亨故求之不至天下有隱居行義才意  
高遠晦迹丘園不求聞達者委所在長吏具名聞奏朕當備禮敷致  
諸色人中有賢良方正能直言極諫及博通墳典達於教化并識洞  
韜畧堪任將帥者委常參官及所在長吏聞薦天下孤老鰥寡孀  
獨不能自活者並委州縣長吏量加優恤有其年九十已上者刺史  
縣令就門存問義夫節婦孝子順孫旌表門閭終身勿事大兵之后  
內外耗竭貶食省用宜自朕躬朕當節乘輿之服御絕宮室之華  
飾率以師儉為天下先諸道供獻自非供宗廟軍國之用一切並停  
應內外官有冗員及百司不委之費委中書門下即商量條件停減  
聞奏布思行賞抑惟舊章今以餘孽未平帑藏空竭有乖慶賜深愧  
予懷赦書有所未該委者所司類例條件聞奏敢以赦前事相言告  
以其罪罪之亡命山澤挾藏軍器百日不首復罪如初赦書日行五  
里布告遐迩咸使聞知

貞元元年正月改元并招討河中李懷光淮西李希烈赦  
門下王者躰元五極欽若乎天地績業以統嚴奉乎祖宗所以敬事  
修誠務本敦孝尊其上以御其下謹其身而訓於人百神允懷庶  
永賴國之大典莫重於斯朕燭理不明遠道招損往遭大難臨陷都  
國天地宗祧曠而莫主是欽若嚴奉之義缺矣朕甚懼焉洎再復京  
師遽將告謝有司以人力耗斲禮物廢隳日居月諸歲聿云暮卜其  
近日輔在上春齋心永懷坐以待曙而百辟卿士抗表上言咸謂人  
心未寧不足以盡勸寇孽猶在不可以告功迫於群情俯抑誠願郊  
廟孔迺瞻言莫從悼心慙顏胡寧自處重以和平未洽災沴荐臻去



歲旱蝗兩河為甚人流不息師出靡居加以徵求因之以荒饑困窮餒殍轉死丘墟而又開轉之間冬無積雪土膏未發宿麥不滋詳思咎徵其失安在豈兵戎之后餘寇尚在將獄犴之中深究未息且河中淮右逆將阻兵汚脅齊人陷之死地雖欲自雪厥路無由抱義銜冤足傷和氣此皆由朕寡德播弄于人為之父母寔用愧耻今玄陰已謝春日載陽句萌畢申幽蟄咸震思與海內同心自新布澤更元用符天意宜改興元二年為貞元元年自正月一日昧爽已前大辟罪已下已發覺未發覺已結正未結正繫囚見徒罪無輕重咸赦除之

### 改元元和赦

朕聞明王之以孝理也必先之以莊敬由一人之至意鼓四表之歡心臻于大和以育庶類則下知禁而不犯上措刑而勿用斯道不遠弘之在于朕以寡昧嗣守丕業荷累聖之洪休稟太上之嚴訓夙夜寅畏不敢荒寧承顏而退有万機問寢而下臨四海眷奉惟獻施于兆人皇王以來孰有斯慶端本之化自予恭行惣百行之源刑四方

之理推恩以覆育廣敬以昭事王者要道朕亦庶乎則日月之燭臨可以率彼昆蛟之涵養期於不夭是必家至日見而後化洽刑清國始所難慎終斯免猶恐下愚之人因循陷辟官司之長教道未明迫於飢寒遂愆禮節誑誤之網領失政之多途哀矜之懷雖得情而勿喜思與公卿大夫下及士庶勵翼循省以圖將來且因躰元之始覃此惟新之澤上報于君父下念于蒼生頒慶紀年鴻恩斯洽可大赦天下改貞元二年為元和元年正月二日昧爽已前大辟罪已下常赦所不原者咸赦除之京畿諸縣今年十二月苗錢及榷酒錢並宜放免地稅率每斗量放二升淮江荆襄等十州管內水旱所損四十七州減放米六十万石稅錢六十万貫内外文武見任致仕官神策六軍諸道將士等加賜爵加勳有差武德以來功臣子孫與官及出身文武常參官觀察節度團練經畧刺史六軍大將等父母七殁與封贈官至憲以來任宰相與追贈及謚陝州奉天元初功臣恩外更賜爵中書門下及外事宰相宜與一子官七品東宮官並與改官其撰冊文官等與一子官及勳爵有差天下百姓高年者賜粟帛羊酒



國子監祭酒司業及學官並先取朝廷有惠望舉識者充東都國子監諸管館共置學生百員應天下州府每年所稅地子數內宜十分取二均充常平倉及義倉仍各逐處當穩便收貯以時舉余務在赦人

### 大和改元赦

朕聞古先哲王之為理也修己以安百姓恤刑以矜庶獄立政以始弘厚澤以躰仁推其心以及於物誠其中而化於外和氣斯洽休徵以臻故兵革不試而四海寧庇癘不作而三靈泰我有唐祖武祖文光宅天下列聖承統遂康區中漸濡丕冒掩軼前載猷茲道以騰英聲煥其文以耀中古惟此鴻業屬于冲人荷無彊之丕構託於兆人之上書揚霄僭怒馬如疾抑惟宗社儲休神功協力克靖內難恢復皇綱思布和以立極爰正風於更始因躰元紀号之典舉肆青覃息之命昭我恤隱與人惟新可大赦天下改寶曆三年為大和元年正月十三日昧爽已前大辟罪已下罪無輕重已發覺未發覺已結正未結正見繫囚徒常赦所不免者並除之惟十惡五逆及故殺人官

典犯入已贓不在免限左降官量移處近已經量移者更與量移其合復資者五品已上中書門下速與處分六品已下任從常例選丁憂去任在憂未赴貶所者服滿日亦與量移如故舊在上都任經本司陳狀不必更待州府申請流貶中縱勅不許量移者及言終身勿齒者亦與依例處分七官失爵各與收叙痕累禁囚並從洗滌其訟去年十二月十八日坐累流隸者不在此限應沿上陵制度及喪儀禮物宜委中書門下及諸司長官博詢故寔務遵禮度必信必誠副朕哀懷所沿山陵造作及橋道致頓所並以內庫錢物充用如不足以度支戶部錢充京兆府今年夏稅青苗量放一半太皇太后第二等已上親大行皇帝皇太后第一等親委中書門下量材叙用九廟子孫陪位者各加兩階仍據始封上后與一人出身委宗正卿檢尋圖譜取一房最沉翳者充教具名聞奏內外文武官及諸色人任上封事極言得失無有隱諱天下諸色人中有賢良方正能直言極諫者及經學優深可為師法詳閑更理達於教化軍謀宏遠堪任將帥者常叅官及官牧群等各舉所知無人舉者亦聽自舉並限來年正



月到上都今年正月上皇太后尊号及朕受册進寶文承制宣制等  
官各與一子正負七品官江王府官去年十二月已前在任者並與  
進改其去年十二月九日立功將士普恩之外三品已上更賜爵一  
級四品已下更加一階其赴難將軍軍使兵馬使都虞侯將士等各  
與改轉名銜聞奏

### 開成改元赦

朕以寡昧祇奉昌圖兢業為心不敢自怠廢乎播祖宗之光烈致區  
宇之康平推誠不疑惟才是用豈謂姦克皆息宗社將危中外叶謀咸  
加顯戮知人則哲雖盛帝以猶難罪已興懷誠為君之不易緬慙古理良  
用惕然是用 元正御正殿首明罪 乃布鴻恩王守澄累朝掌任久  
握禁兵忠力雖多憊誤難掩交通雜類引進姦邪專弄威權蠹害時  
政鄭注李訓引見竊息二三舊臣誣陷非罪誠子寡昧抑有其由遂  
使姦惡構連功起前殿王涯買餼舒元與李訓宰輔股肱叶謀不軌  
王璠郭行余節將在京率兵上殿羅立言李孝本紀綱臺府深入領  
徒韓約誘金吾衛兵立成向皆魏逢駟騎來往鄭注自出成師將

相通謀情狀咸具上天降祐氛祲已清討其本囚以正刑辟王守澄  
既云去難議深責自特進已下官爵及寔封並宜削奪豐以鐘於既  
往思既覃宜於有截可大赦天下宜改大和十年為開成元年自正  
月一日昧爽以前大辟罪以下罪無輕重常赦所不免者咸赦除之  
其在降官量移復資及才用足稱者中書門下處分流貶人中元勅  
不許量移及終身勿齒者並與量移其去年因汾朋黨連累并十一  
月二十一日坐罪流貶者不在此限其身亡伏法者委所在州府量  
官殮任所親收葬制服其戶部度支鹽鐵應有諸色欠負大和五  
年以前者並放免諸道賀正端午誕降賀冬進奉起今權停三年其錢  
充細放百姓兩稅所在除藥物口味茶果外不得輒有進獻百司及諸道  
應宣索製造一物以上並停三年京畿百姓兩稅已降凡一歲之內徵取者  
并百官職田並全放一年其京兆府一年所支用錢物斛斗 等並勒鹽鐵  
使以開元元年直進綾絹充還同州河中絳州去州早歉賦稅不登宜放開  
成元年夏青苗錢同州賜雜穀六万河中降州共賜十万石委度支戶  
部見貯粟麥充賜三省九列御史臺選出陟使十人親問風俗進賢退



不肖興行新制務令通俗天下鎮戎文武帶憲官者解補進退並須  
奏聞其邊州合置譯語學官常令教習以達異意内外文武官及諸  
色人任上封事極言得失有補時政者必加升擢待以不次其有藏器待  
時終身崑兀奇節特行可激風俗者委常叅官及所在長吏各以名  
聞文武之道合而兼濟勲臣子弟有能修詞務學應進士明經及通諸  
科者委有司先加獎引河朔節將以州縣歸國者張茂昭田弘正程權  
各與一子官子弟堪任使者委中書門下量加引用應内外文武官進  
階加爵有差

### 改元廣明詔

朕祇膺寶命嗣守丕祧夙夜一心勤勞八載實欲驅黎元於仁壽致華  
夏以升平而國步猶艱群生寡遂災沴荐起寇孽仍臻功弄干戈連  
攻郡邑雖通降款未息狂謀江左淮南瘡痍既甚湖湘荆漢耕織屢  
空言念疲羸良深軫惻我心未濟天道何如賴近者嚴勅師徒稍聞  
勝捷皆明聖之潛祐寧非惠以言功厲節變三陽日當歲首仍御正  
殿爰命改元况及發生是宜存宥繼業守文之主握圖御宇之君必  
自正月吉辰發号施令所以垂千載之懿範 百代之洪基莫不由  
斯道也可改乾符七年為廣平元年

### 改元天復赦

門下三階慧宇暫移宸極之尊兩耀暗昏始表忠正之救朕臨御寡  
惠妖孽殊常蒙塵於便殿之中受制於逆臣之手奪璽振指備肆侵  
凌挾刃礎肯幾罹酷毒閉開行偽則公卿不在其謀懸勝見誣則黎  
庶不堪其詐害我骨肉殺我嬪嬙悖惡滔天古今未有側陋嘗膽幽  
憂下宮皇穹降悔禍之靈將相竭同心之惠鳳翔節度使尚書令政  
王茂貞鎮于右輔首激剛腸有食失七筋之驚有車及蒲骨之怒開  
內之沉幾貫日剛納衛兵夷門之忠憤凌雲顯懲却吏三藩唱義四  
海叶詞咸以密謀咨于上相於是禁軍之內三傑捷生上玄假以良  
時高廟付其英斷月正元日新正吉辰質明而逆首梟懸中旦而克  
渠剖裂共申匡復皆著功庸尋下詔書遍行賞典而茂貞既平國難  
來覲天庭駟武旅而篳食爭迎駐皇都而秋毫不犯推殊功以薦同  
志留爰姪而董推師繼筠能稟規程肅清輦轂人神洽慶革裔偕來



亦既十旬暨于初夏朕以脫於幽辱復正宸嚴重守寶圖不改舊物  
上愧于列聖下慙于兆人思弘蕩穢之恩仍草幾年之号庶明有罪  
皆在朕躬可大赦天下改光化四年為天復元年四月十五日昧爽  
已前大辟罪以下罪無輕重已發覺未發覺已結正未結正繫囚見  
徒常赦所不原者咸赦除之惟十惡五逆屠牛鑄錢合造毒藥故殺  
人及持仗行劫者官典犯正人已贓兼以踰濫身名冒僞官秩及刑獄  
之內官吏用情致成冤濫不問有贓無贓並不在原免之限其劉季述王  
仲先王彥軌薛齊握同謀凶逆徒黨支屬追宥未到者不在赦原之例  
其疎遠親屬素不通連衆知良善一切不問其左降官非與十一月  
五日交涉者並與量移元勅不在量移者亦與量移已經量移者更  
與量移近處具情非蠹政心不挾邪曾經兩度量移者便與復資委  
中書門下酌量處分流人及降流者與移近處如已收叙者量才叙  
用其左降官與流人已達貶所者或至亡沒家口欲還及須歸葬者任從所  
便如孀幼孤窮不能自濟者則委所在州府量與優恤發遣先有官者各  
還本官上帝降靈將安丕祚中朝多難爰有誠臣登好爵以報殊庸

尋行令典錫嘉名而大慶用表洪勳靜海軍節度使檢校太保平  
章事李繼昭嶺南西道節度使檢校司徒平章事李繼誨寧遠軍節  
度使檢校司徒平章事李彥弼並早恭禁衛累著勳勤生知忠孝之  
源洞識君臣之義齊心瀝血果成復國之功左袒一呼遂定安劉之  
業叔姪繼先臣之烈彥弼稟大父之規據其大勳曠古難比宜加美  
稱以播無窮繼昭繼海彥弼宜賜號扶傾濟難忠烈功臣各加食封一百  
戶六軍將士並賜號懷忠定難功臣應樓前左右神策及諸軍并鳳翔興  
德兩道立仗兵士等各委所司准例各與優賞以報効勞宰臣司空崔循  
揮涕入朝含酸蒞事防切發於趨翔之際阻兇謀於譚誼之間明大  
直若屈之機見反經合道之旨忠唯愛我奮不顧家始則裂帛為誓  
合契禁軍班列之臣忠良景附再安宗社寧愧古賢雖已疇庸未為  
報惠宜賜回天興祚平難功臣并加食封一百戶仍圖形凌煙閣功  
著定傾名高死難永言風烈詎廢賞延故尚父子儀贈太師晟贈太  
尉秀實贈太保瑊贈司徒杲卿贈太師真卿張巡許遠南霽雲等家  
有主祭祀本房子孫中每家各與一子九品正員官功格一時賞延



後嗣既配廟之享仍傳祭載之門所以勵壯節於千秋勸能臣於百代况新誅叛黨尤景英風武德貞觀以來歷朝配享功臣及安金藏等宜委中書門下各搜訪本房主祭子孫第其勲蔭量其人才各與叙用其有進狀叙陳者委所司磨勘不得令有僭濫闕畿不守先帝西巡惟我輔臣首圖義計而故救復京城西面行營諸軍都統鄜夏節度使李思恭揚威北鄙決勝東橋佐鄭畋匡復之謀倅岐陽統制之命提戈奮勇運策摧兇終成逐雀之功顯就回鑾之計逮予初位尚洽嘉謀追膺崇勲宜膺廟食其鄭畋已有別勅處分其李思恭宜委中書門下特與加贈仍配享僖宗皇帝廟庭故西面行營副都統涇陽原節度使程宗楚故收復京城行營都統行軍司馬前朔方軍節度使唐弘夫各持將節來佐台旌爭鋒而深入王城力屈而銜冤寇壘莫覩歸元之兒空留不朽之勲言念竭忠更隆茂典宜委中書門下並與追贈故南面招討使天平軍節度使曹全政頃當強敵大振奇勲彎弧百戰於陣前奪槊橫飛於馬上天時莫救壯氣空存宜從超等之褒用勸百夫之特委中書門下優與嘉贈有客之詩前經具載繼絕之美歷代先所言念於斯豈忘舊典介公鄙公各與一子九品正負官其二王三恪後各委有司准舊制修建大臣國之臣歿身無悔所祈後代雪彼沉寃大和七年故宰相王涯已下一十七家並見陷逆名本蒙密旨遂令忠憤終被寃誣六十餘年幽枉無訴且霑恩霈用慰泉扃宜並與洗雪各復官資如有子孫在人家隱藏者任自詣闕及州府投狀如非虛謬則與量材叙用故鎮海軍節度使李順節頃歲姦邪亂政慨慷不平偶洩藏謀遂罹橫禍仍遭誣構被以罪名雖已行昭雪之文未降褒崇之命宜申緝禮以慰忠魂委中書門下優與追贈寢園之內充奉之間夙夜兢憂慮有遺闕其諸陵臺令委中書門下切加選用仍令所司給與優料陵丁柏子不得則有役使功須陵料以時栽植其每年奉陵諸縣差配芟刈人夫不少殊不用功徒為勞擾自今已後但每年芟雜之時委京兆府於本縣苗稅錢數內酌量功價支付陵令遣自和雇人夫委拜陵官常加點檢其下官宇舍委宗正卿京兆尹差官縣司同加點檢修飾務致尊嚴維城之重本枝之良叙敦是先渥恩當厚其宗室子孫自興德行在及光化元年所出



放身及合許非時而叅選者並委本司准舊例處分施行切令詳寔不得致令踰濫仍令吏部切加磨勘修集之人辛勤可閱訪聞旅食動必逾年皆是吏曹及門下省因循致茲留滯始於磨勘逮至進黃自冬涉春不得了絕自今委中書門下切提舉吏部一事已上並須准舊例程限不得致有淹延自兵興已來吏道全削辦已及期者或衆人恤者幾希遂使柔柘日摧荆榛歲茂將救黎元之命宜求撫字之仁應兩京畿赤縣委中書門下切加選擇務在得人諸州府縣令錄宜三選不得輕於注受切須審以人材畿內編人久罹兵革雖連年豐稔而尚困艱貧念彼瘡痍宜加隱惻應光化元年二年三年秋夏稅合輸納屬府州縣及諸州斛斗草錢等所有逋懸並宜放免不得輒令官吏尚有追徵其去年秋所欠即不在此限郊沂之內兵革以來言念凋殘固宜矜憫差徭人役須羅撓人在司局中之中又宜集事其京兆府每月合差赴飛龍掌閑雖是輪差諸縣不免長撓疲人宜令府司於苗稅錢內每月據所差人數月每人支錢送付飛龍司仰自和雇人夫充役途路所先通商是切閑畿之地橫賦非宜致物價之益高自商徒之難濟令鹽鐵司及兩神策軍先有兩市雜稅並令停罷自今已後畿內軍鎮不得擅於要路及市井津渡妄置率稅雜物及牛馬猪羊之類其有違犯者有人糾告以枉法贓論之鎮縣節度級及諸津渡訪聞每年與販百姓廣有邀求致令滯停切念兩軍京兆府差人覺察顯行痛斷都市之內屋宇未多聞浮造之人常須更出地課將期招葺宜有指揮應諸坊於公私地內浮造屋宇每月地課不得更有收徵旬服生靈正當彫瘵太倉輸納務在均平儻容厚歛之姦頗失愛人之意自今後太倉所納料斗仰司農卿准舊例主掌校量之際切在奉公不得先任吏人抑屈百姓朝舊制止有擢酒喪亂以來遂行賈麴本自度營利近年兼借兩軍畿甸之人皆言不便所宜徇衆不廢瞻軍起今年五月已後京畿內任自製造私麴仰度支京兆府依舊例於酒店量戶大小逐月納權沽錢仍酌量隨月依前借軍諸司充諸色支用其兩軍元造麴制下後便勒逐斤減價六月三十日已前貸賣官麴其私不得更貸賣至七月一日以後不得更賣官麴之限爰自亂離殆將二紀閑畿之內掠奪



頗多遂令黔首人徒或被丹書之辱曠茲究抑須杜姦訛舊格買賣  
奴婢皆須兩市署出公券仍經本縣長吏引檢正身謂之過賤及問  
父母見在處分明立文券并關牒太府寺兵戈以來條法廢壞良家  
血屬流落佗門既遠家鄉或遭典賣州府曾不尋勘豪猾得恣欺凌  
自此准京兆府並依往例處分兩市立正印委所司追納毀弃改給未  
記行用其傳典賣奴婢如勘問本非賤人見有骨肉證驗不虛其賣主  
并牙人等節級科決其被抑壓之人便還於本家委御史臺切加察定  
其天下州府如有此色亦仰本道觀察防禦刺史各行條制務絕凡冤  
免懸諫鼓禹拜昌言在明哲而尚然寔古今之所重况乍祛蒙昧希致  
和平思謬諤而若療朝飢雖激訐而亦不加罪諫官舉職須務濟時  
其文武常參官素懷述業者任上封章極言得失必當召見親問所  
陳其有才識幽深事禪時政者即識升擢或藏其器俟時隱於品谷  
者委文武朝官所在州縣以行實聞薦舉衆目者寔資於綱領愆庶務  
者必究乎本根將尋沿革之宜諒繫弛張之道其有事不稽古官不易  
方欲正濫原須遵故實應有諸司法廢制陞多時未復舊規者自今後  
宜委諸司各檢舉條錄聞奏委中書門下詳酌處分漢徵極諫晁董  
陳理亂之端晉策能言洗立貢闕遺之政乃登道廣請舉公平試在得  
人以臣不逮應天下諸色人中有賢良方正能直言極諫博通墳典達於  
教化軍謀宏遠政術詳明者文武常參官及諸道節度觀察等使其姓  
名聞奏薦至十一月到京朕當親臨冊試擇其可否施行紹背燕毛禮  
經所重即險頌繫漢詔所矜克存尚齒之規免致遺年之誚天下高年  
鰥寡八十以上委所在長吏切加安恤其有不幸者量與奠送仍存  
撫孤育嗚呼文王姜里克建周邦太甲桐宮用興殷道朕不敢忘六  
甸之辱公侯宜獎成万代之功進忠賢以啓政途黜邪佞以懲  
庶乎上下共保我高祖太宗之洪基

改名

武宗改名詔

門下王者昭臨萬寓名豈尚於難知勤順五行理宜避於刑剋徵諸前史  
義實炳然昔大漢之興洛旁去水所都名号猶乃避之况我國家運昌上  
德豈可常以王氣勝於君名所以憲宗皇帝繼明之初實以捨水必有



冥敷叶於貞祥漢宣帝柔服北夷恢弘祖業功德之盛侔與周宣御曆  
十年乃復美稱朕遠推漢主之事近稟聖祖之謀爰擇佳名式遵令  
典庶承天意永保鴻休宜改名為炎仍令所司擇日分命宰臣告天  
地宗廟其舊名中外表章不得更有迴避布告遠近咸使聞知主者  
施行

會昌六年三月十二日

臣聞運行之道寔本於惟新稱謂之尊必資於前兆 天人相與之際  
明曆數陰 之祥恭惟烈光布在方冊伏為仁聖文武章天成功神  
德明道皇帝陛下仁深九有道冠三無紹列聖而垂休奄百王而邁德  
六氣雖序重之以調均五音雖和資之以損益使刑刻自消於聖曆陰陽  
永遂於洪爐亦由周樂去金以享卜年之兆漢都罷水用興繼代之  
光此皆九廟之靈兆人之慶臣等官叨近密職奉絲綸拮躅之誠倍萬  
常品謹奉制如右請奉制付外施行

唐大詔令集卷第五

唐大詔令集卷第六

帝王

尊号批答

先天二年不允上尊號

依王公等請上尊號制

答朝集使蔣欽緒等

答侍中裴光庭等

答再請表

答三請表

肅宗答右僕射裴冕

太上皇答皇帝上尊號誥

太上皇答皇帝上尊号及讓大聖字誥

太上皇答上尊号并辭大聖字誥

太上皇帝上尊号并大聖字誥

太上皇兄上尊号誥



寶應二年上尊号答詔

答第二表

答第三表

答百寮請復尊号

永正元年答宰相上尊号

元和二年答宰臣請册尊号第三表

元和十四年答南省官上尊号

答宰臣請册

答第四表

長慶元年答宰臣上尊号

答第二表

答第三表

答第四表

寶曆元年答宰臣上尊号第四表

大和六年答中書門下上尊号

會昌四年答宰臣上尊号第五表

大中元年答百寮上尊号第三表

大中三年答宰臣上尊号

咸通十年答上尊号第四表

光啓元年答上尊号

先天二年不允上尊號

朕觀上古之主惟稱帝王一字秦漢以來乃兼皇帝朕以薄德嗣守寶圖軋、厲惕懼不克堪豈自崇飾以招譴咎雖迫公卿之請終負平生之心所請加尊号甚無謂也

依王公等請上尊号制

蘇頲

門下朕聞天授命者為天所子人歸德者為人之主故崇高有莫大之尊司牧有非常之號蓋承天叙而立人極也我唐丕業完開之初朕以眇身託元元之上紹休聖緒欽若昌圖戡多難而極綴旒蕩群兇而夷觸柱 安區宇上戴若親朝庭以又家國以治斯又叶天心而從人願也太上皇釋海內之重負官公陰之遠情以朕功宣提劔運膺拜紐爰



奉睿謀惣親庶政日慎一日問安以慶於三朝為子為臣順色靡違於五讓虔共若屬寢興是抵賴遐迩宅心戎夷內面奠敦風於寬大思致俗於仁壽而王公卿士獻書草議陳帝皇之錄考天人之符廼以鴻名加于菲德然則徇至公之議難以私拒當至誠之請不可詞奪陟川罔濟當宁興懷劬遂禱祈增益當畏所請上尊号曰開元神武皇帝者宜依有司可消日練辰虔告郊廟詳諸舊典備禮進冊布告天下咸使聞知主者施行

先天二年十一月五日

答朝集使蔣欽緒等上尊号

開元聖神文武

禮貴正名法無虛美朕以薄德嗣守丕圖常恐不迨安敢自足今群岳稱引衆善勞加榮號聞之增惕奚可當仁惟聖與文為得輕議况太宗睿宗俱稱聖謚予未小子安敢同之宜斷來表

開元二十六年

答侍中裴光庭等同前初表

卿等思致君光舜欲加号聖文朕內省虛懷安敢當此又太宗睿祖皆有聖謨纂承祖号安敢同稱幸躰朕懷宜斷來表

答再請表

聖文之名稱号所極卿等致君光舜亦宜尊以冲摛超駕前王弥增夕惕豈朕好譽之心內著自矜之色外形招此假辭以相虛美靜思反照撫事求心詩云我心匪石不可轉也幸悉所守即斷來章

答三請表

惟聖與文洪名極稱內省虛缺安敢冒承匪石之心已具前答方與卿等上調元氣下遂蒼生致削浮華化滷敦朴斥崇高之号去滿假之端勉建皇極以迎天祐悉此至言宜斷來表

肅宗答右僕射裴冕上尊号

朕以眇身劬神明兩比遭狂胡擾亂宗社不寧稟上皇至聖之謀當伏鉞秉旄之任大師一振殘孽無遺上皇猷彼代紛弃茲人事万邦之重畀付朕躬傳受寶符仍加徽號朕再三固讓實增僥倖恭膺典策感慶良深覽卿等來章倍加祇懼依卿等所請

至德二年十二月

太上皇答皇帝上尊号誥

昊穹垂祐宗社發祥往在齡年素彰岐嶷洎乎問寢日增孝劬吾父勤庶務常奉至真特好清虛尋將付託尔以華戎銳事掃定神州功



乃格天惠惟邁古是用爰茲國寶加夫大号典章私集喜慰盈懷寔惟道映前王何必志在讓禮克承丕業以副至公卿斷來表

太上皇再答皇帝上尊号詔

三朝問禮五讓丕罔用躬后之師載戡牧野同周王之步來人鎬京固美朕縑緇功伴造化命之守器加以鴻名掃掃運而有融當樂推而難拒予棲神道要養至真元邦家又寧自多愉悅

太上皇答皇帝上尊号并讓大聖字詔

天地肇啓皇華聿興故三王垂御罔之述典墳著牧人之要爰立邦家其來尚矣予承百王之遐運繼五聖之丕業亭育區宇寵綏蠻夷罔不率從多歷年祀頃者姦臣煽禍中原構疊汝眷略懸於兩曜鴻勳格於九天終古莫儔上天是賴故加之大聖建以崇名用膺多福何所與讓予夙達玄妙遠寄真宰凝神澹泊足可自怡至於宗廟陵原嘗展慶矣郊禋豫動固陳儀焉方期仙於上境已遺榮於中域汝欲歸尊於父實在因心爰及朝臣亦同懇願且無為於冲漠又何取於徽名宜悉此懷周全至道耳云

太上皇再答上尊号并辭大聖字詔

古者華胥大庭神農皇帝淳俗歸於太素正真契於無為雖不累煩纓六崇其稱号吾久尋玄旨遠襲仙宗既欣寰野之遊更樂瑤池之宴倏然自返豈在尊名尔親率百寮至于再請則蒸之孝實覲於當今而蕩之德獨慙於上古頻覽章表懇志難違汝寶命惟新鴻勳允集用加大聖之字克副昊天之心若承命無渝万国同歡於綏載儻固辭不已吾亦未膺乎典冊勿為多讓宜協至公朝野之情固多榮幸也

太上皇答王上尊号并辭大聖字詔

道高者必傳其迹德著者必享其名汝廓淨妖氛載安社稷万靈式叙豈非大乎兩儀交泰豈非聖乎吾所以親受寶符自題徽号寧唯對於列辟諒已聞於率土渙汗之出理不可收綸言之行事必有在將固撝謙之道是遠億兆之情天地神祇未以為當宜膺景命即斷來章

太上皇先上尊号詔

汝孝以親明以御宇上從君父之命下徇黎元之請既弘茂寔爰



副洪名千古攸高百王是式徇還章奏嘉慰可知予思每集虛心恒  
遺照万契真宗之旨豈云稱号之榮汝就養無違歸尊有裕再猷從  
龜之吉復當乙巳之辰已備典章當依來請

寶應二年上尊号答詔

朕嗣守洪名欽承丕措克清多難奄旬万方聖靈在天玄德敷祐南  
面共已朕何有焉巨猾削平非予之武言念海内生人至艱兵鋒猶  
虞暴骨未掩日旰忘食宵分疲懷遽稱成功良謂虛美玄官俯畢豈  
期即及改元寶位至尊何以更言加号宰臣之任職在匡弼進勸之  
辭深所不取

答第二表詔

朕內省德薄在於人上高祖太宗之天下承上皇先聖之丕業惕然  
南面常懼君難豈因樂推亦自光大况山陵甫尔濡露增懷寓縣凋殘薰  
風未暢遽行古制虛受鴻名是用絳思木宜猷可五始之義誠在躰元  
三年之遺取其無改所陳徽号亦有舊章若更尊崇得非自聖股肱輔  
弼惟欽致君空勤誠請之辭未副昌言之理

答第三表詔

叶五紀成歲以受時君臨万邦向明而聽政躰元不潤其色處實不為  
其賓朕若昔大猷允懷共已務於簡易豈曰崇高常深負荷之憂敢忘  
祖宗之烈卿等摠括群議昭升舊章周爰典籍之文鈎校天人之理對揚  
耿命進勸皇圖請踰年而改元益正位以加號敢廢春秋之義用諸啓  
沃之心劄允乃誠良多慙德

批百寮請復尊号表

三省來章弥用兢惕再崇大号何以當之前者示懷盖非冲讓尚勞敦  
請豈所宜然卿等博學古今列於朝右思弘猷替共致大和豈以虛名  
重予不意再三徇復增惡于懷想尔深衷勿更陳請

正元六年

批答宰臣請上尊号

伏以高祖太宗接千載之統垂無疆之休太上皇承九聖之烈傳莫大  
之慶嗣德續業允文允武弘帝堯之欽明宗玄元之清淨付朕天下願神  
保和至道光於唐虞至仁合於天地卿等虔述休惠祇猷鴻名徇者再三  
允符朕意朕獲守寶位丕承眷訓雖虔恭寅畏不敢怠惶而澤未洽於



群生理未臻於皇極。遽言徽号何以當之。雖嘉乃誠。難遂來請。其上獻  
太上皇尊号。宜依所奏。凡百卿士當躡至懷。元貞元年

批。答宰臣請再冊尊号第三表

朕獲承丕叙。以撫万邦。臨照無日月之明。膏潤無江漢之浸。常恐吉蠲雖  
備。未享於天心。教道雖勤。未諧於人欲。諒慙匪德。敢議鴻名。而品臣群公  
宗后。庶尹上引祖宗之丕矩。下述黎猷之心。誠誠予以處泰而思勞苦。予  
以愛名而務寔陳。以懇迫至于再三。先典不可以固違。群情不可以屢阻。  
與其牢讓而繁飾。不若納規而徇公。遂抑至懷。勉從來請。願惟不稱。  
兢惕殊深。元和二年十二月二十二日

答南省上請上尊号表

朕纂嗣洪業。託于王公之上。常恐涉道猶淺。燭理未明。夙夜祇畏。罔敢寧  
逸。至於法天象以垂制。順人心而平亂。立刑辟而不峻。興禮教而不倦。  
簡黜澆薄。浮延納忠。直思濟于道。保合大和。今寰海削平。載岐弓矢。皆  
賴輔弼之臣。盡規於。將帥之略。宣力於邦家。循省表章。請崇徽号。  
武功文德。揚美於予。用愧于懷。何以及此。尚以昆夷未。邊鄙猶虞。  
不敢允從。宜即漸表。元和十四年

答宰臣請冊尊号第三表

昔我祖宗。每崇徽号。皆以道侔天地。澤被生靈。故請之不疑。而受之不愧。  
謂是典禮。鴻光赫然。朕以寡昧。祇承寶位。虔躬惕厲。不敢荒寧。常懼禮  
化示敷。非以自尊為意。若蕩清寇孽。修舉政刑。此乃中外英賢。叶心所  
致。復于前疏。亦已言之。卿等善則稱君。過陳功。息表章。二至益愧。于  
懷。豈大躡之必然。何懇言之不已。沉吟終日。未果允從。

答第四表

建崇功加大号。必自盛德。而因全功。苟非其時。難以擬議。朕紹十聖之統。  
叙遵百代之憲。章冕而事天。憂不暇乃者。忠臣飲化。良將策勳。有寇難  
而必。必平用兵。戈而不惶。不早此。乃多士叶力。成此小康。豈予一人  
獨運。而致卿等。四陳章疏。每瀝肺腑。表士庶之誠心。微朝廷之故寔。願  
飾虛美。皆為過談。諭而復來。勢不可止。雖重煩典禮。殊不自安。而深念  
奏陳。亦當從允。勉依所請。良用愧懷。元和十四年六月七日

批。宰臣請上尊号表



朕以菲德初承大寶嚴恭夙夜修己臨人燭理未明舉政多闕雖克展如禋之禮或未稱瑞應之符而俗尚彫訛人未康乂所惠德之未立不惠名之不尊至於狄求和而西戎即叙南越投戈而率化東夷繼踵而來主不候七旬之期自銷積紀之弊此皆祖宗垂祐公卿叶贊之力也朕何有焉遽議虛名深愧未稱卿等志思將順誠切志君宜躡至懷勿徇虛美

長慶元年四月

批宰臣請上尊第号二表

元稹

朕聞天職生植聖職教化天職舉則四時行聖職修則万方理然而天不以行四時而為惠故蕩蕩無名聖不以理万物而為功故謙謙不宰願朕小子獲承丕圖上賴祖宗之靈下託股肱之力先鎮奠次來幽燕皆吾日月之所照臨車書之所徹迹失之則有以自愧得之則何足自多况今四方雖清物力方困六戎雖伏邊備尚勞百吏雖存官守多曠万目雖設紀律未張此四者不敢違寧思與卿等夙夜俾乂卿宜為我提振大法修明致經龍震竄戎狄康阜黎庶回者既理名焉用哉朕方以臯夔之務委卿、宜以克舜之事教朕驟加徽号深恥近名循省表

章難徇來請

長慶元年四月

批宰臣請上尊号第三表

元稹

昔齊桓議封禪管叔驟諫其未宜晉武平江東何曾深惟其遠馭彼二臣者居安思危之志明有犯無隱之誠切也况朕寡德謬膺昌期賴先帝削平之威蒙列聖滌漬之澤聿來燕翼克靜華夷既無惠而有威實以祥而為懼卿所宜朝夕納誨警予荒寧雖休勿休日慎一日而乃過為溢美頻上鴻名諒多丹赤之誠殊非藥石之愛汝為予礪為朕揣摩汝為予舟為朕康濟雖我懿号不若致我為有道之君加我虛尊不若加我於無過之地宜罷來請用副乃懷

批宰臣請上尊号第四表

元稹

朕以元月正日祇見九廟對越于上玄千官在前万乘居後親聲明文物之盛望城社宮闕之尊尚念高祖太宗艱難於營制憲考慤勤於績復懼不克荷以羞前人寅畏嚴恭式冀無過而燕趙底定戎獫和寧寔惟列聖之休安敢自大其意左右輔弼庶尹師長猥以鴻名願加薄惠三詔執事抑而未行物議逾堅予衷未信存陳章表備列古今且



曰告虔之時寧忘繼志問安之下胡不畏心事有切於顯榮理難從於封執於戲允恭克讓既見奪於群情克己為仁庶自勤於三省勉依來奏深用媿懷

長慶元年五月日

### 答宰臣上尊号第四表

前上三章皆有報旨推本帝王之道研究天人之際可謂盡矣能無諒哉朕辭愈堅來奏愈懇考著龜之意酌卿士之心義貴從人事難徇志然躰未濟之象警慎將然復大畜之文模法徃行虞舜勤民以恭已文王事帝而小心自厲則鑒乎殷湯盤銘持盈則戒乎周廟歌器還珠却馬使無愧於前賢非食罷臺異有示於來世率是道也庶無悔乎勉遂群心祇循祖訓敬先誠請愧惕良深

寶曆元年四月三日

### 答中書門下上尊号

朕以否德纂承春罔業、乾、懼不克荷是用發天地無私之道以成化象日月無私之照以燭幽纂唐堯虞舜之為君繼貞觀開元之致理朕以夕惕宵興不遑遐逸冀將昭復聖哲保綏華夷至於鴻名猶不輕議尚未當庶豈可屬心卿等台鉉重臣翼宣元化宜匡朕志臻于緝熙

今陰雪傷和尚資寬宥乃有文武至德加于朕躬省事奏章難從虛美宜斷來表深諒予懷

大和六年正月日

### 批答宰臣上尊号第五表

前覽四表報皆一辭可謂君臣之義至矣天人之理盡矣朕辭益固情益堅誠猷可之不移柰虛美而難處山雖崇而降地易象明言海雖大而下川玄元深旨文王以小心事帝虞舜以恭己臨民盤銘取勵於殷湯歌器戒盈於周廟皆以畏惕而自警不聞滿足而虛尊卿等以塞北平胡山東殄寇韜兵偃武鑄戟為農郊天之年瑞雪清路冊號之夏嘉雨滅災毀摩足壞法之邪蕩并寇亂常之暴此皆上玄厭禍宗社儲休至於刑政克明文武具舉年登適臻其氣順俗阜寔自於官修內承宰輔之謀外盡藩侯之力余雖垂拱且有功况增鴻徽尤非稱德既頻推美何以當之然躰貴從人事難徇志祇循前訓克遂群情殊不自安諒非緘欲勉尔所請深用媿懷

會昌四年十月七日

### 答百僚請加尊号第三表詔

朕獲承丕緒奄有万方愛物之心常懷惕厲何天之力漸至底寧此



中外元僚文武庶政咸有一德以匡冲人而卿等猥以鴻名加于菲薄拜章滯懇至于再三伏念自列聖以來何嘗無今日之請然率不能讓者上慰宗廟之靈下迫群臣之願粵子小子豈敢久勞卿士之心哉劄允乃誠良深自愧所乞宜依

秋中元年十月

答宰臣請御丹鳳樓上尊號

勅旨没陷河隍百有餘載中原封界咫尺戎疆累聖含容久勞征伐伏思元和中將據宿憤常欲經營屬誅鋤叛臣未暇收復今則恭行先志克就前功不遠徵兵不勞財力二州之外兼得七閩又取維州粗成邊業尚以息民解甲未收山外諸州且以肆青申恩所以頒示天下其御樓依所乞

天中二年十一月二十五日

答宰臣曹確等請加尊號第四表詔

夫功合天者稱皇德合地者稱帝皇帝二者朕以享之况孤寡不穀之名靡傳於玄祖明皇孝德之號久忝於冲人業二號一惟懼不稱未變未誓師旅尤屯東寇雖平瘡痍尚大方將罪已昌敢矜功卿等修德銳於阜陶恥君不如克舜鋪陳故事增飾洪名謙恭愈堅表章

疊至對敬之際忠懇彌彰私我以奉先勉以從衆亦念乙酉之歲堅請不俞今復因違以矜小讓名實不副朕當不敢荒寧始終相成卿亦勤於猷替勉爾來請深用愧懷

咸通十年十月十日

答宰臣蕭遘等上尊號

朕猥以寡德丕承耿光宵旰雖勤兵戈繼作困生靈於豺豕委保闕於榛蕪罪已則深噬臍何及尚賴天地悔禍祖宗降靈內之則公卿大臣外之則方伯元老上憑眷祐下憫蒸黎允叶一心克濟四海廓妖氛於富縣剋戎壘於郊圻雖復舊都匪遑高枕嗚呼大耻才雪群生未蘇文武典章墜無半在威權法制行亦幾何土疆徒繫於地官征賦罕歸於國帑蕭蕭恭常祀猶在正緯昭格上玄寧容溢美卿等同匡艱運當識深衷加以虛名斯為不急步驟錙銖之際自有至公昭臨顯晦之間寧資外獎當勤納誨宜斷末章

光啓元年五月五日

答第三表詔

朕以寡昧嗣守丕圖思臻大和不敢寧處于戈載戢稼穡少登禮樂中興声教遂被是用郊上玄以報本解密網以緩刑豈非九廟降靈



群賢叶力共贊薄德致茲少康永惟眇躬寔懼虛飾卿等上稽天意  
下採人謠旁訪典謨俾奉明訓以為天地之道既不讓於強名皇王  
之心宜屈已而從物累負躬勤懇至於再三雖鑿井耕田未及勛華  
之理而樂推欣服難違億兆之情既徇衆嗣終疑溢美勉爾來請深  
用媿懷

唐大詔令集卷第六

唐大詔令集卷第七

帝王尊號冊文上

應天神龍皇帝冊文

開元神武皇帝冊文

開元天寶聖文神武應道皇帝冊文

開元天地大寶聖文神武應道皇帝冊文

太上皇加光天文武大聖孝感皇帝冊文

睿聖文武皇帝冊文

元和聖文神武法天應道皇帝冊文

應天神龍皇帝冊文

維神龍三年歲次丁未九月景申朔五日庚子具官某及文武群臣等  
謹昧死再拜稽首奉冊言爰自厥初肇興司牧皇矣撫極蒸哉察道莫  
不因時適變改物殊徽推五運而陟崇高步三徽而應曆教天地人皇  
之立稱別始洪荒唐虞夏帝之居尊漸詳文質姬水以推輪發号烈  
山以斲耒增名然後仁被德宣功昭業遠歷訪前古茲為舊式大唐

英華  
四百四十二  
李嶠



受乾坤之賤命當寓縣之謳歌奄有黎庶遂荒宸象應天皇帝陛下  
垂旒御辨截海披罔承四業之休光握三靈之寶契虞舜蒸之德永  
錫群方周文翼之心其疑庶績駸齊人於仁壽致雅俗於醇醲六府  
咸修五戎不用航海梯山之客奉贄輸課耕田鑿井之夫擊壤鼓腹中外  
靜謐表裡邕熙而孽子滔天亂臣干紀謀同觸瑟禍劇弄兵不虞之災  
忽生於肘腋無象之鑿獨憤於神祇于時凶豎逼樓聖君憑檻威靈下濟覺  
封豕之周惶醜逆上瞻見神龍之輔翼寶仗似億千之衛天儀成丈  
六之容衆端共臨羣妖大駭盡迷方而失據咸奪氣而忘精頽眊而  
斬馘舉屍指麾而冰銷霧廓雖復草為兵甲秦師驚蔣帝之神樹作  
幡幢釋主屈魔王之衆地軀之變媧后蛟影之隨漢高未足以匹此  
竒徵方斯偉應自非冥符幽贊眷感潛通何以承波若之護持享高  
明之福助昔者伏牛之主是曰犧皇名鳥之君仍題鳳紀法身用  
馬鳴成道上士以龍德為仙敢託元符爰資故寔謹上尊號曰應天  
神龍皇帝鴻猷載肇昌曆惟新庶以仰順軋心俯從人欲天長地久  
更隆四大之尊名玉振金聲恒為百王之稱首盛矣美矣皇哉唐哉

臣某等誠歡誠喜頓首死罪死罪再拜以聞

開元神武皇帝冊文

蘇頌

維先天二年歲次癸丑十一月辛酉朔二十八日戊子攝太尉臣某等六千五  
百一十四人等言臣聞厥初生人首出庶物不自理惟后所以康義后不  
自尊惟人所以歸社古先哲后安人育物表初崇号不可辭也皇矣上帝  
臨于巨唐降胤氤氳垂耿光重熙而累盛至大皇而授聖皇臣等敢稽首而  
言曰曩者景龍之末長蛇縱禍陛下慮宗社之墜提劍夷之則因親以尊  
主間朝有賊臣天罰大懲陛下拯邦家之難援旗剿之則厝枉以舉直戮  
不及嗣惡惟其身思與王公卿士下建元元揚闔澤而布和氣臣又  
聞之軒之華胥堯期姑射未有一其道而順太皇之心文王昭事武王  
續緒未有一其時而君聖人之位褰裳釋衆至公也端宸嚮明至孝  
也使九族惇叙百工允釐東西南北砥礪聲教彼靈有四招翠黃而  
可乘我寶有三指珠玉而不御然猶發揮禮樂馳騫典墳論思獻納  
進善從諫日慎於一日矣上稽天意下考人謀卓哉協元符而鍊靈  
命而已夫開者泰也罔弗享元者善也罔弗利神者聖也罔弗通武



者威也。因弗服，臣等不勝大願，昧死上尊號曰開元神武皇帝。謹上玉冊。玉璽。臣等誠惶誠恐，死罪死罪。謹上。

開元天寶聖文神武應道皇帝冊文

維天寶七載歲次戊子五月庚午朔十三日壬午攝太尉銀青光祿大夫守刑部尚書兼京兆尹上柱國潁川郡開國公臣蕭昊及文武百僚等謹稽首奉開元天寶聖文神武皇帝陛下。臣聞惟道至大王者均其名。惟天不應聖人光其德。陛下弘啓玄宗紹開皇運，淳化既洽，勞謙有恒。每滌覽真經，虔心明祀，將以答三靈之睠命，為萬姓而祈福。故得玉芝敷白魚見，卿雲降仙傳對，敬之休必有不可讓者也。於是公卿宗子耆艾法流，詣闕奏章，願增徽號。至于再至于三，伏奉甲戌詔曰：禎祥者所以合天人，鴻名者所以彰德業。今封章繼至，誠詣甚勤，劬膺神休，允答人望。臣等不勝大慶，謹上加尊號曰開元天寶聖文神武應道皇帝。伏惟開闢之功，簡易之德，與道同運，躰軋無極。

開元天地大寶聖文神武應道皇帝冊文

維天寶天八載歲次己丑閏六月癸亥朔五日丁卯攝太尉開府儀同三司行尚書左僕射兼右相吏部尚書崇玄館大學士集賢院學士修國史上柱國晉國公臣林甫特進行左相兼兵部尚書崇玄館大學士太清宮太微宮使上柱國臣希烈及文武百官正議大夫檢校禮部尚書上柱國清河縣開國男賜紫金魚袋臣崔翹等謹再拜稽首奉冊。開元天寶聖文神武應道皇帝陛下。臣聞自昔帝王與道同功者，道寶降焉。與天合德者，天命彰焉。陛下功冠九皇，德包三古，而猶虔恭夕惕，朝禮上清，復玄化之雍熙，致蒼生於仁壽。故昊穹眷命，烈祖垂休。玉芝再產於宸居，瑤圃懸記於仙洞，混成微旨，允屬聖躬。陛下推美廣孝，克崇祖宗之禮，群臣以公議納忠，庶叶承天之意。乃有卿雲散彩，瑞日重輪，對敷大号，固不可辭讓者也。於是公卿宗子耆艾法流，顯然詣闕奉章，陳請陛下。猶謙冲之德，至於再至于三，伏奉景辰詔曰：陰騭既啓，公議屢陳，惟懷永圖，劬依來請。臣等不勝大慶，謹上加尊號曰開元天寶聖文神武應道皇帝。伏惟覆載之功，廣大之業，丕膺鴻烈，寶祚無疆也。



太上皇加光天文武大聖孝感皇帝冊文

徐浩

維至德三載歲次己亥正月甲戌朔五日戊寅太上皇若曰古之握乾符建皇極社稷不可無主帝王唯其有歸則堯禪舜舜禪禹畏天命也啓嗣禹武嗣文從人望也革命易姓舉至公於國纂戎繼統用不私於親斯美大矣朕承五聖之不業宅萬國而為君膺時撫運載將四紀受帝與齡寔受多福曷嘗不虔公至道亭育群生早厭黃屋之勤每懷紫霄之取惟父知子我有元良惟君安人以思付託皇帝天縱睿哲日躋孝勤率性之至通於神明財成之道冠子宇宙朕往以蕭牆之難克保宗社故先帝俾予以生鬯頃者中原之禍期輯邦家我於是命尔以伏鉞當經綸雲雷之除柳沐風雨之時思愍宿心累有成命而義不奉詔謙不踰尊至于再三明慈懇讓洎即戎致討觀兵朔漠馭取豪傑用服乃功于明辟天亦集天命于尔躬推之至公終陟元后夫名以制義器以昭德今群公卿士咸旅于庭明聽朕言敷厥成訓於戲奄有四海克康兆人光天之業也經綸天地戡定禍亂文武之公也雄圖英算大聖也保國安親孝感也今加徽号子皇帝曰光天文武大聖孝感皇帝授傳國璽符受命寶符各一上副于天中契于神下叶于人三者朕無愧焉永保累聖之鴻緒對一人之休命朕將訪道峒山追蹤汾水超然金闕之上終以玉京之道不其至哉良願畢矣宜令司擇日即行冊禮

睿聖文武皇帝冊文

李吉甫

維元和三年歲次壬子正月癸未朔十一日癸巳攝太尉銀青光祿大夫守兵部尚書兼御史大夫上柱國趙郡開國公臣李巽及文武官五千七百九十四人等言臣聞自天玄而升地黃其凝皇王之道堯舜首出故典謨述焉自堯及唐曆紀三千致理之君不過十教升平之運不至五百天人之交際不其難歟我唐運之興昌期是膺四海一統十聖丕承以至于皇帝則君十一而年二百矣歷考前代丁于斯時皆王澤已竭君明寤替未若我后之惟新厥命我唐之中興厥祚顧視周漢不其蔑與伏惟皇帝陛下紹太宗之英武稟德宗順宗之宣畏乾坤翼翼若不滿志故爰于文母順色之孝也睦于兄弟因心之友也崇讜議察迹言去疑謀杜讒說俾王道正直砥為夷塗發前聖之韞匱披人文之光耀



而氣有沕者及時為妖若黎崇之不恪苗人之逆命或誕敷文誥或震疊武功聖造不疾而速非陛下疇能之然後奉四表之歡心惣百神之受職竭祀之清廟嚴禋於上玄天地祭而神祇著矣臣聞之君人者謙遜靜慈則天應之以福故休祥出焉慈惠愛育則人應之以誠故鼓舞從焉王者因人心稽天意天人俱應而徽号加焉至公之道不可辭也臣等所以勤懇至于再至于三願奉鳴徽以彰休德陛下猶三揖而五讓之久而固已始降俞詔於是百辟卿士洎四方侯衛之臣上言曰陛下誕眷聖之姿膺會昌之期經天地之謂文禁暴亂之謂武臣等不勝大願謹奉玉冊玉寶上尊号曰睿聖文武皇帝惟陛下懋一德勤万邦千祿百福垂唐之無疆

元和聖文神武法天應道皇帝冊文

崔群

維元和十四年歲次己亥七月丁丑朔十三日己丑攝太尉金紫光祿大夫檢校司空兼太子少保上柱國鄭公食邑三千戶臣綬及文武官五百七十一人等言臣聞惟天惠人惟元后作人父母大寶曰位至公者君帝皇尊稱肇自三五其義尚矣堯舜禹湯文武成康垂于典籍為万代法非名歟躬有天下武丁大其業周有天下宣王嗣其訓在漢七葉亦稱盛強中興之美與我不類皇唐統天二百有二載祖宗崇光四海一家禮文憲矩章焯大備元符昌曆畀付有在洎我后之握圖也齊心於穆清垂意於大寧文昭武烈冠今邁古始負固不若者莫匪顛踣輸忠來附者克保蕃社天寶之季孽臣干紀靈誅亟掃餘氛未弭兵不得戢六十五年于茲矣元和致理思索弓矢睿謀前定所嚮風靡兩河既清太階砥平戴白之老欣感出涕不其盛歟伏惟睿聖文武皇帝陛下德配天地明並日月嚴薦于宗廟盡劭于郊禋孝通于神祇仁浹于動植內睦于九族外懷于四夷乙夜觀書日昃聽政恤刑懋賞劭農勸學歷選列辟英声茂寔其何以加焉日者額不龍其告讓罔悛任下推誠出師徂征玉壘金陵之遐阻懸瓠營立之險或肆于都市或懸于藁街其餘瑣細蓋不足紀上以據列聖之憤下以叶千齡之慶然後闢四門貞百度會寓縣之玉帛旅梯航之貢篚咸曰不圖貞觀開元之化復睹於今日矣陛下勞謙祇畏不自遐逸讓德乎上天推功於羣臣訪闕政修隆典不以龜龍為瑞以賢俊為瑞不以珠玉為寶以慈儉為寶卓哉煌煌信可假玄穹而蟠厚載者已足宜膺尊徽名



膺顯號以光于典冊以順于人心以答于天意不可辭也臣又聞之居安思危納諫盡下遠諫慝旌謙直愛養黎庶敦尚朴素斯皆高祖太宗順宗之遺訓也而陛下躬行之造次必於是寤寐必於是定萬姓之福無疆之休僉曰功成而禮不崇德廣而名未稱臣子之罪也於是百辟卿士藩衛者耄耋稽首上言至于四三陛下深秉謙冲詔諭往復不得已而從之伏以紀年之盛冠于大號厥有舊典書不云乎乃聖乃神乃武乃文傳曰惟天惟大惟堯則之則法也王者昭事上帝取法於大道德經曰天法道道生一唯上聖至德兼則利物行清淨自然之道為能應之臣等不勝大願謹奉玉冊玉寶上尊號曰元和聖文神武法天應道皇帝伏惟陛下景福是膺如日之昇雖休勿休翼、兢、對越鴻名丕赫成能万壽百祥罔不豐登天祚聖唐惟聖欽承臣綬等誠歡誠躍頓首頓首謹上

唐大詔令集卷第七

唐大詔令集卷第八

帝王尊號冊文下

文武孝德皇帝冊文

文武廣大聖廣孝皇帝冊文

仁聖文武至神大孝皇帝冊文

仁聖文武章天成功神德明道大孝皇帝冊文

應乾聖壽太上皇冊文

文武孝德皇帝冊文

維長慶元年歲次辛丑七月乙未朔十八日壬子金紫光祿大夫檢校司徒兼太子少保上柱國公食邑三千戶嚴綬文武官六千二百七十七人等言臣聞天以萬物付聖人聖人本天意而保義之惟犧農先天而貞惟軒轅奉天而行惟堯舜法天而明莫不細溫粹精昭建鴻名以至子夏殷周漢謙儉服義仁愛忠利亦著稱謂代濟其美當隋之末我高祖神堯皇帝救拯焚溺應天立極蕩氛昏揚凱澤父教而母育恩德高肌骨肥大寶季歲賊臣紊常塵起幽陵毒流四方累聖含弘視人



如傷餘拏勢滋專土擅強憲宗因大時順人心舉武經明大刑連拔  
堅險顛陪同惡冥上深冗猶恃榛穢干戈不得息者綿六十七祀建  
我后之御曆紹太宗之求賢審官舉直措枉躰玄宗之尊師敬道清  
靜致理法肅宗之循名求寔刑賞用中廣德宗之亭毒含容博採虛  
受而後展嚴於配玄夷思於法宮從物無私推誠至公需矣乎廣受  
寂然乎感通神武不殺而天下會同昔以康祀夏聿修皇祖之訓周  
武繼統務廣文王之聲爰洎宣王克服蠻荆勞來安集洎漢光武既  
平隴蜀聽政忘寐伏惟皇帝陛下以至聖之姿誕啓昌運重明之業  
紹開中興豈無避遠從風悅化而自草豈無氛翳羽夫明昇中而自除皇  
澤暢於九圍文命敷于万國則向之敷王何足稱哉尚復孜孜庶本不  
遑勞謙日晏講道求賢議獄恤刑聖詠進直以利物勤人為政本以  
檢身戒懼為化先自誠而明日慎一日是以天道惟新於景命玄德亟  
聞於四方億兆咸曰大哉君心復曰懋哉君功降延喜之玉揚仁壽之  
風恢帝囿廓皇綱崇鴻名顯無疆不然者何以答上靈之眷命乎何以惠  
庶氓之懇望乎於是垂白之老緇黃之衆與侯甸藩衛之士守闕稽顙日以

上請臣等所以勤勤懇懇敢固以言陛下猶堅秉撝揖至于三四不  
得已而降前詔於是百辟卿士考天人之意稽典禮之義進而言曰  
陛下崇儒問道恭默致此文之明也保大安又感懷夷夏武之彰也  
嚴恭寅畏博受廣勸孝之大也宣慈惠和忠恕和物德之盛也臣等不  
勝大願謹上玉冊玉寶上尊号曰文武孝德皇帝伏惟陛下天之錫昭  
聖之功高明有嚴慎德無窮赫々融々與天比崇臣綬等誠歡誠懼頓  
首頓首

文武大聖廣孝皇帝冊文

李逢吉

維寶曆元年歲次乙巳四月甲戌朔二十日癸巳攝太尉銀青光祿大夫  
檢校右僕射兼太子少師上柱國天水郡開國公食邑二千戶臣趙宗  
儒及文武官六千五百四十一人等言臣聞自古王者之御極也必上奉  
乎天地不承乎廟祧法天地所以宅八紘嚴宗祧所以垂万業非休聲震  
越不足以齊燾載非尊稱超卓不足以光祖宗則名實之際不可誣  
也肇自上古質文未具號兼三五事本羸劉其後正閏相承南北更  
王僉事因襲而罔圖旌別苟鴻猷既洽徽數莫申貽諸裔昆靡所稱



謂抑當時臣子之罪非所謂納君於善者皇唐烈聖備有典常高宗而降代享丕号以至于玄宗之治平肅宗之盪定德宗之烈文憲宗之戡剪先聖之克荷重熙累盛震邁古昔未有不由斯者已伏惟皇帝陛下濬哲自天寬仁在躬聖齡方富眷德成備行懋于未卽聲飛于青宮始踐祚而虞舜之大孝聞焉既郊天而文王之小心著焉竭爰敬於兩宮示儀刑于四國慎束名傳優寵直言自嗣位已來百度惟貞九圍式叙邊烽固不罷屬國固不來靈化有眇嚮之助風而無伏愆之候至玄至蹟可勝道哉由是百辟群司耆儒碩生文武臣庶緇黃幼艾殊形一心異聲同辭隳肝瀝膽元上徽稱其誠至矣吾皇猶惕然三讓不得已而俞焉斯謙尊而光卑而不可踰者也夫經緯天地曰文則二儀交泰矣克定禍亂曰武則八蠻順軌矣格于上下非聖歎通乎神靈非孝歎臣等恭考庶言強名聖德不勝大願謹奉玉冊玉寶上尊号曰文武大聖廣孝皇帝伏惟陛下祇上帝之眷命荷累聖之儲休外順四夷內從百辟時承昌運昭受鴻名然後躬大易不已之義思禮經日新之旨鑒休之至誠考無逸之格言以緝熙庶績重其文以斥去群邪盛其武以日

聰載大其聖以慎守九廟益廣其孝克儉克難有初有終所疎者佞所近者惠政遊必省獻替必從無忘我高祖太宗之丕烈以永家邦臣宗儒等誠歡誠懼頓首頓首謹上

仁聖文武王神大孝皇帝

李德裕

維會昌二年歲次壬戌四月乙丑朔十四日戊寅攝太尉光祿大夫守司空兼門下侍郎同中書門下平章事臣德裕銀青光祿大夫守尚書左僕射兼門下侍郎同中書門下平章事臣夷行金紫光祿大夫守尚書右僕射兼中書侍郎同中書門下平章事臣珙銀青光祿大夫守中書侍郎同中書門下平章事臣紳及文武百官金紫光祿大夫檢校司伎兼太子太保臣僧孺等六千五百七十四人等言臣聞義皇首太古之号成湯顯甚武之稱我高祖皇王是憲尊名若古詔厥丕訓為子孫之法豈不善始善述哉矧乃巨唐受命繼躡天業運將至大君以興昊穹所以開至聖也曩者明兩未定帝華不協舍胤傳聖深惟至公先后所以昭天命亦由堯發於唐侯文興於代邛神明之祚不其難乎伏惟皇帝陛下清明博愛光取四海玄德莫隣天休天賚日角見表志氣如神爰



初定命正心理物如辰居其極而天下無邪矣由是昭德塞違尊賢遠  
作禹不自滿成不敢康罔遊于田不迓于色自閔壺以施主教由家道  
而形國風去比周核名寔孳權網擇聖紀修舊典協誠質托嘉壇款太  
一進正臣以端治表禮故老以求謹言遠無蔽獄近無留令祈玄祖而  
膏雨降祀靈嶽而嘉穀登省刑罰而違孛消發倉廩而螽螟息去歲  
就旂承祀大輅親郊捧玉瓚而一獻光靈來格振金石而六變魄寶  
昭臨然猶古訓是學緝熙于道天文炳煥雲漢其章溫恭劬遜承太  
任之教和樂愷悌洽戚藩之心德風偃于群黎威靈動于絕域又以劬  
養不逮於是長樂昭配未升於禰宮每懷嗣徽蒸蒸而慕所以奉天  
若慈訓對越兩儀因心立制永錫其教寬底劉之罪典惻隱之仁迴霜  
收電為之反汗及單于慕義景附朔邊耀德戢兵兼臨是受至於備  
文物展國容莫不先甲而布甘澤丁辰而廓陰腎和景晏溫卿霽網  
蘊斯所謂神祇之心應矣天人之際交矣於是服冕之士戴鶡之倫  
暨藩衛邦伯黃髮鮐背不謀而進曰陛下玄默天眸輝光日新大矣  
孝熙四極愛臻誠 玉 溫潤鏤鴻名之德神寶焜耀萬斯之年丕天

大典不可辭也陛下猶謙退固拒至于三四群臣不已乃曰俞哉夫  
徧覆包含之謂仁極深研幾之謂聖憲度著明之謂文蠻夷震疊之  
謂武感而遂通之謂神無思不服之謂孝臣等不勝大願謹奉玉冊  
玉寶上尊号曰仁聖文武至神大孝皇帝伏惟陛下乾健不息謙尊  
而光樂戒其耽禽戒其荒壽乃侔於殷宗俗乃厚於成康昭燕後昆  
受福無疆臣德裕等誠歡誠懼頓首頓首謹言

仁聖文武章天成功成德明道大孝皇帝冊文

李德裕

維會昌五年歲次乙丑正月己酉光祿大夫守太尉兼門下平章事臣  
德裕光祿大夫守尚書右僕射兼門下侍郎同中書平章事臣棕朝  
議大夫檢校尚書右僕射兼中書侍郎同中書門下平章事臣李讓  
夷朝議大夫守中書郎中兼戶部尚書同中書門下平章事臣崔鉉  
及文武百官大中大夫守太常卿臣孫簡等六千二百二人等言臣等  
聞在昔周宣檢狝內侵四牡薄伐以定王國則詩人大其功暨乎漢宣北  
夷乖亂呼韓慕義邳支遠遁則簡冊著其美惟此二代稱為中興間者  
開成之末星孛如雲螟飛蔽天先帝戚之黎人懼焉乃授至聖遺大授



銀迄茲成功厥有冥教伏惟仁聖文武至神大孝皇帝表應龍翼粹  
含軋剛神全而正氣凝宇定而天光發智燭千里動必察微心鏡萬  
機物來斯應於是五材用四維張建中和之極綴前聖之綱重樞機修法  
制刑御家之理無出裊之言銷諛邪遠巧佞斥背公之黨退好徑之人  
內嚴躰貌增堂陛之峻外絕締交去輔軍之勢古所謂受命於天唯舜  
獨也已又曰一心定万物服唯陛下得之曩者北狄矜功耗蠹中國種類  
盤牙根柢封殖異術肺附縞衣如荼扶邪作蠱浸淫宇內倒懸不解百  
有餘年既而龍祠裡滅攜國款塞質帝女感漢壇有狼顧平城之心  
鯨吞盛樂之志爰命梟將擐旗刈旃兵鏖穹廬大烈荆榛颺蜀幙碎  
輶六羸逖逃貴主生還剗滅妖迹剷除醜類故名王結髮冠帶入臣  
堅昆稽首靺譯來獻而又奸臣放金二紀陸梁據太行之回下窺洛  
邑通故絳之道旁睨近閔樹其遺孽以竊兵柄議者僉曰精甲十萬  
積穀十年泉魚不察湯網宜懸陛下雄斷霆聲群疑冰釋揚清風以  
掃雲鼓迅雷以破山任馮異則拔天井而震上黨杖吳漢則發突騎  
而傾邯鄲壺關失嶮山東奪魄屬有成邊叛將竊發參墟人心搖蕩  
異議放肆陛下臨朝而言曰二寇獲罪于天子可不捨未三旬而定  
晉陽綏期年而滅潞予不以金購豨將多降不勞師克粵首馳報非  
至德感物孰能臻此乎由是台宰百辟藩屏將帥上言曰成伐東夷  
而肅慎來賀景剪七國而王室乃安莫不始於武功終致刑措將以  
裡上帝薦祖宗且受鴻名以荅玄旣陛下猶謙而五讓之勤罔已乃  
屈已以俞之雲漢為章所以昭法度也神明其德所以成教化也巍  
乎有功帝堯之則也勤于大道玄祖之訓也臣等不勝大願謹奉玉  
冊玉寶上尊号曰仁聖文武章天成功神德明道大孝皇帝伏惟陛  
下不有其名以保其成不德其功以戒其盈享所宗之福致周道之  
平熙我王度永振金声臣德裕等誠懼頓首頓首謹言

應軋聖壽太上皇冊文

張弘靖

維永貞二年歲次景戌正月景寅朔皇帝臣某稽首再拜奉冊言臣  
聞上聖玄邈獨超乎希夷強名之極猶存乎言象豈足以表無為之  
德光不宰之功然稱謂所施簡冊攸著涵泳德澤感於精誠願奉鴻  
徽有以自竭伏惟太上皇陛下道侔玄元業纂皇極膺千載之休曆



承九聖之耿光宣昭化元發揚大号政有敦本示儉慶有格天漏泉  
息翔春風仁育群品而成功不處褰裳去之付神器於冲人想汾陽  
以高蹈躰堯之德與神同符其動也天其靜也地觀一事表無德而  
言焉願茲寡昧屬膺大寶懼忝傳歸之業莫申繼述之志夙夜兢畏  
惟懷永圖今天下幸安皆睿訓所被而未極徽号孰報君親是以台  
臣庶官文武之列抗疏於内方伯播守億兆之衆同詞於外請因壽  
曆以播鴻名臣不勝大願謹上尊號曰應乾聖壽太上皇當三朝獻  
壽之辰應五紀啓元之始光膺徽稱允叶神休斯天下之慶也臣稽  
首再拜

唐大詔令集卷第八

唐大詔令集卷第九

帝王

冊尊號赦上

開元二十七年冊尊號赦

天寶七載冊尊號赦

天寶八載冊尊號赦

天寶十三載冊尊號赦

乾元元年冊太上皇尊號赦

廣德元年冊尊號赦

開元二十七年冊尊號赦

勅執大象建皇極者必藉彛訓而受鴻命所以應乎天而順乎人也  
朕嗣守丕業二十七年受命之初既膺明號尚多祗懼已謂崇高公卿  
宗子緇黃耆艾披誠瀝懇詣闕上言僉以為乃聖乃文祖宗大烈恭  
惟績服必在欽承願以休名施于薄德抑而不許凡已十年爰追于今  
又八請上追奉先之義下稽從衆言將存至公不可因拒以今日



本崇儒人之應也。化洽而風俗休寧，氣和而疵癘不作。天啓道運，其可讓也。上蒼元符，願增徽号。彼誠詣闕，累自封章。至講逾勤，懇詞難奪。以今日劄膺典冊，曰開元天寶聖文武應道皇帝。式副人神，感懼交集。宜廣恩於善貲，俾叶慶於惟新。可大赦天下。自天寶七載五月十三日昧爽已前，大辟罪已下罪無輕重，已發覺未發覺已結正未結正繫囚見徒常赦所不免者，咸赦除之。其左降官及流移配隸安置罰鎮効力之類，並稍與量移。亡官失爵，放歸不葢及諸色被停與替非衰老疾病者，宜所司量加收叙。人和年登，休運斯屆，輕徭省賦，惠政攸先。將洽小康，必弘厚貨。其天下百姓米載租庸，並宜放免。及諸色勾徵等亦一切放免。自古帝王建邦受命，必劄先代以修舊章，周備禮文。既存三恪之位，漢從損益，唯立二王之後。自茲已降，且復因循，將廣繼絕之恩。式弘復古之道，宜於後魏子孫中簡擇諸屬均然相承者一人，委所司勘責。准鄜公介公例，定為三恪陵廟所奉典職。維宗事雖更於有司，任豈循於恒秩。其宗正卿與太常卿同品。其少卿及丞亦宜准此。又上古之君存諸号代，雖事先書契而道著皇王，緬懷厥初，寧忘歲秩。其三

皇已前帝王宜於京城共置一廟，仍與三皇五帝廟相近，以時致祭。自古受統之主，創業之君，皆經濟艱難，戡定禍亂，雖道謝於古今，乃功施於人，用率典章，亦崇禋祀。其歷代帝王摩跡之處，未有祠宇者，宜令所由郡量置一廟，以時享祭。仍取當時將相德業可稱者二人配祭。仍並以圖畫立像。如先有祠宇未需享祭者，亦宜准此。式閭表墓，追賢紀善，事有勸於當時，義無隔於異代。其忠臣義士、孝婦烈女，史籍所載，德行弥高者，所在亦置一祠宇。量事致祭。古者鄉有塾黨，有庠所以明尊卑之儀，正長幼之序。風化之道，義在於茲。先置鄉學，務令敦勸。如聞郡縣之間，不時訓誘，閭巷之內，多虧禮節。致使言詞鄙褻，少長相凌。有點清猷，何成雅俗。自今已後，宜令郡縣長官申明條式，切加訓導。如有禮儀興行及綱紀不立者，委採訪使明為褒貶，具狀聞奏。道教之設，風俗之源，必在玄弘。聞以敦風俗，須列四經之科，冠九流之首。雖及門求進，頗有其人，而覩奧窮微，罕聞達者。豈專精難就，為勸獎未弘。天下諸色人中有通明道德經及南華等四經，任於所在自舉。各委長官考試申送。其崇玄生出身自今已後，每至選宜減於常例一選，以為留



放朕每以道九有屬思竭精誠經教所存豈忘崇奉且從其道者師  
其人行其教者尊其禮晉瑯琊王公府舍人楊真人護軍長史許真人  
丹揚上計掾許真人皆道著妙門感通玄闕降高真之跡為上清之宗  
後漢張天師教元和德宗太上一正之道出贊生靈梁中散大夫貞白  
陶先生高尚塵表博達玄微綜緝真經傳俾後學並令右司審定子孫  
將有封植以嗣真也天師冊為太師貞白冊贈太保其天下有洞宮山各  
置天壇祀宇每處度道士五人并取近山三千戶蠲免租稅差科永供  
灑掃諸郡有自古得道昇仙之處雖令醮祭猶慮未周宜每處度道  
士二人其靈迹殊尤功應遠大者度三人永修香火其茅山紫賜觀取  
側近百姓二百戶太平崇元二觀各一百戶並蠲免租稅差科長充修  
葺洒掃應天下靈山仙迹並宜禁斷樵採弋獵如聞山林學道之士每  
被搜尋且法之防邪本有所以至於宿霄妖記亡命聚眾誘陷愚人故令  
禁斷郡縣逐一槩迫逐至道之者不得安居自今已後審知清潔更不  
得恐動以廢修行其五岳四瀆名山大川各另本郡長官致祭朕刺意真  
經虔誠至道莫憑玄祐永錫黔黎每朝禮三清則宵衣忘寢或齋戒

一室則蔬食屬厭不以勤躬為倦務以徇物為心况於宰祭尤加惻  
隱自今已後天下每月十齋日不得輒有宰祭又閭閻之間例有私社  
皆殺生命以資宴集仁者之心有所不忍亦宜禁斷且因親設教式本  
於人倫自葉流根必逮於榮養内外文武職事官有五品已上其父祖  
見在而無官者各授一官仍聽致仕其祖母見在准母例處分京官五  
品已上正員官如父母已没未有官者亦宜追贈所司勘會即與處分  
睦親之義因心不忘前開府儀同三司竇瑒頃以容納微人頗虧典憲  
永懷舅氏追感渭陽宜申國恩再復榮秩可開府儀同三司仍放優  
閑不須朝會王澤無私豈殊於中外大端有慶頻屬於京華寬大之典  
則已溥覃惠施之恩特申曲被其京城父老宜各賜物十段七十已上仍  
授本縣令其妻版授縣君六十已上版授本縣丞天下侍老百歲已上版  
授上郡太守婦人版授郡君九十已上版授上郡司馬婦人版授縣君八  
十已上版授縣令婦人版授鄉君仍並量賜酒麵内外見任文武官九品  
已上宜各賜勳兩轉其京文武官見任京及致仕并陪位官諸方通表  
使及月番官等一品賜物一百匹二品三品並八十四匹四品五品五十四匹六品七品三



十匹八品九品二十段兩京留守各八千匹其節度使採訪使并諸官稱充使  
未迴並同在京例賜物貴妃楊氏稟性柔和平因心忠孝克恭克慎蹈禮循  
詩加以勤志玄宗叶誠嚴奉率勵宮掖以迪闕睢宜賜物三千匹嬪御等  
賜物有差太真觀雖先度人住持尚少宜更度迫士七人太子諱賜物二  
千匹慶王琮已下各有差率土之內賜醕三日

天寶八載冊尊號赦

自昔皇王受降必降於元符天人叶心乃章於大号朕續承玄緒虔奉睿  
圖何嘗不精意真宗勵心庶政幸以邊隅底定風雨時若人和歲稔且洽  
於邕熙極瑞殊祥荐臻於昭應故得玉芝再產祕牒玄通斯皆至道降  
休先聖儲祉菲德曷以克當是用祇薦崇名永揚鴻烈而群公百辟  
援義比事誠請不已因辭不獲以今日敬膺典冊曰開元天地大寶  
聖文武應道皇帝徽章載茂寅畏增深宜因稽古之典式布惟新  
之澤可大赦天下自天寶八載閏六月五日昧爽已前大辟罪已下罪  
無輕重已發覺未發覺已結正未結正繫囚見徒常赦所不免者咸赦除  
之朕永惟風俗之本漸興返璞至於弘貸之名亦思復古天下百姓大夫為  
戶頭者宜各賜爵一級征鎮之役其來自久雖存素備諒在變通頃者  
用兵蓋非獲已今西戎摧殄北虜歸降南蠻東夷咸皆稽顙亦可謂四  
海無事万里廓清減戍息人思弘善貸其諸軍鎮兵非切要可均減者  
宜令本鎮節度與所司商量處置聞奏其百姓有頻經征鎮者已後  
差點之次不在取限高年給侍本屬存養因時定式務廣仁恩其天下  
百姓丈夫七十五已上婦人七十已上宜各給中男一人充侍仍任自  
簡擇至八十已上依常式處分唐虞省刑盡冠不犯秦漢制法密網  
唯煩理亂之間得失斯在朕長想遠古務崇敦朴刑期不濫政叶無  
為豈惟守於平邦庶有臻於大道頃者詳諸條目已從簡易至於結  
斷尚慮深刻所貴從寬示其知禁宜令中書門下與刑部大理法官審  
更詳定法律之間有所非便者具牒自奏禘祫之禮以存序位質文之  
變蓋取隨時國家系本仙宗業承聖祖重熙累聖盛既錫無疆之休合  
享登神宜弘不易之典自今已後每神並於太清宮聖祖前設位序正  
上以明陟配之禮欽若玄宗下以盡虔恭之誠無違至道比來每緣禘  
祫時享則停事雖適於從宜禮或虧於必備自今已後每緣禘祫其



帝享無廢。又奉先追遠禮惟昭德。崇福展新義在因心。自今已後。獻祖宣皇帝宣莊皇后忌日。宜令京城一設齋。太祖景皇帝景烈皇后。元皇帝元貞皇后忌日。京城一日行道。玄宗妙今。宴備徽言。垂範傳學。將宏至化。朕所以發求遺之使。遠令後訪。因聽政之餘。親加尋閱。此刊謬爰正。簡編必在闡揚。以敦風教。今內出一切道經。宜令崇玄館即繕寫分送。諸道採訪使。令管內諸郡轉寫其官本。便留採訪。郡大一觀。將讀聖人垂訓。蓋先乎道。學者崇本。必有其師。文宣王與聖祖同時俱為教首。雖考言比德。理在難明。而問禮序經。跡彰親授。恩廣在三之義。用崇得一之尊。宜於太清太微宮。聖祖前更立文宣王像。與四真人列侍左右。且道降真符。天有成命。藏之于密。則取固名山。彰之以類。則發祥星洞。况靈仙所集。宜表殊休。太白山可封為神應公。所由時祭祀。其金星洞改為嘉祥洞。所管華陽縣改為真符縣。仍於洞所置一祠。宇仙人臺。下置一觀。兩京并十道於一大郡。亦宜各置一觀。仍並以真符玉芝為名。每觀度道士七人。修持香火。戶部侍郎兼御史中丞王鉷。以才受委。以忠奉上。須命精求。玄計克叶。神心宜旌。迺誠俾正。章綬特與三品。其李渾等四人。既親傳真誥。因獲元符。常有甄明。用旌福應。宜令中書門下量其所能。具狀聞奏。當別處分。又九州之鎮。寔著禮經。三代之典。必崇望秩。事既屬於報功。義有弘於錫命。其九州鎮山。除入諸岳外。宜並封公。仍各置祠宇。如先有祠宇者。量更增修。以時致祭。其五岳四瀆。雖載常祀。儲慶發祥。當申昭報。宜令所在長官。各陳祭禮。名山大川。亦量事致祭。天下侍老。並量賜酒麪。內外見任文武官。職事官三品已上。賜爵一級。四品已下。各加一階。其京文武官。見在職。京諸色陪位官。通表使等。賜帛有差。率土之內。賜酺三日。

天寶十三載冊尊號赦

王者事大明事地。察修身慎行。孝德彰矣。故風化天下。和睦興焉。致敬宗廟。考祖來格。是則禮莫大於嚴享。孝莫大於揚名。有以通于神明。有以光于四海。朕承真之道。續聖之業。欽若光訓。惟懷永圖。寶貨必寶。慈無為而理。自南自北。有截來成。五教聿興。家服仁孝。四靈感應。物必純誠。有郡公卿。方方夷夏。僉奉玄貺。徵長發於真源。屢薦鴻名。願昭彰於至德。封章守闕。再于三加以聖祖。錫符玄中。啓迪天心。垂裕榮光。降



臨敢不丕承固執冲讓乃展因心之義以弘推尊之典虔上冊禮齋肅  
思成入室倏然敢忘于日出戶而聽度幾有聞揚美謚於無疆展永懷於  
罔極從拜後禮既尊先式副群心允成義今日訖膺典冊曰開元天地大寶  
聖文神武證道孝德皇帝大号載崇祇若增懼宜因布和之式弘在  
宥之澤可大赦天下自天寶十三載二月九日昧爽已前大辟罪無  
輕重已發覺未發覺已結正 結正繫囚見徒常赦所不免者咸赦  
除之官人犯入已贓不可更令却上後不須為累其左降官並稍量  
移近處其及逆緣坐流配之色宜與量移其王鉷李林甫崇崇耀阿布  
思等並寄任非輕苞蘆特甚原情義法深所難容况日月未淹罪坐  
尤重即從寬宥何以懲肅應緣親累流配者並不在該及之限左降  
官承前遭憂皆不得離任孝行之道所未弘通情禮之間深可哀恤如有  
此類宜並放歸仍中省計至服滿之日准法處分自今已後編入常式其  
中有非及逆緣坐及情理切害有父母老年不任相隨無昆弟養者詳  
停官歸侍及有身衰老以罹譴責情願停官者委本道採訪簡擇具  
名牒中書門下然後放還鰥寡悖獨之絕者量加賑給三載黜陟百

王令典殿最之迹庶問攸歸欲更別遣使臣慮有煩擾今歲宜委本道  
採訪使具官人善惡奏聞以申勸沮自臨御已來四十餘年棧樸延想  
寤寐求賢林藪無遺旌招不絕猶慮昇平已久學業增多至於徵求  
或遺僻陋其博通墳典洞曉玄經清白著聞詞藻宏麗軍謀出衆武  
藝絕倫者任於所在自舉仍委郡縣長官精加詮擇必取才實相副者  
奏聞朕尊崇先謚霜露增感于以孝思無忘錫類其內外見任官階俱  
是三品已上父未有五品官及無官以亡歿者宜各贈五品及母無邑号  
者亦與追贈其見任四品五品清官上借是五品已上者亡父母先無官号亦  
准此追贈且厚其風俗五教之旨聿興責于丘園十翼之風斯在其士庶  
間其衆推孝悌累代義居高尚確然隱循巖穴者委採訪使博聞訪  
薦其孝義之人已經旌表雍睦無易純至有終著美鄉閭深可嘉尚各  
賜勲兩轉以彰德行天下侍老百歲已上版授本郡太守婦人版授郡  
夫人各賜綿帛五段粟三石八十已上版授郡縣令婦人版授縣各賜綿  
帛兩段粟兩石太清宮闕聖祖仙居頻降休徵屢貽啓迪不有優異  
豈表殊常其本宮道士宜各賜物三十段道門威儀玉靈貞賜物五十



段陪位大德各賜物二十段因心推崇增上美謚惟官統職必在正名今以太常尊事宗廟安可列署為名禮不逼尊情期達敬五陵署改為臺其猷陵臺寺五令及丞並昇一階以彰崇奉五岳四瀆及名山大川并靈迹之處先賢祠廟各委郡縣長官致祭其有陵墓祠宇頽毀者量事修葺亞猷皇太子賜物一十段終猷榮王琬賜物五百段其餘各賜階爵有差其郡守縣令職在親人必在公勤用康黎庶凡所推擇皆竭廼誠寵錫之間須甄異等普恩之外太守等並賜爵一級縣令賜勳而轉庶期勉勵以表朕心其京文武官一品賜物一百匹二品八十匹三品七十匹四品五品五十匹六品七品各三十匹八品九品各二十段東京北京留守節度採訪使并京官准勅出使來回者所賜物並同見在例左相陳希烈純粹之道載穆朝廷文儒之風式瞻師表且叶和時令翊贊昇平柔嘉其德克壯元老與子五品官賜物五百匹攝太尉奠瓚上冊書寶冊讀冊右丞楊國忠當朝正色百寮紀綱節遺身三階往石况發揮孝理潤色鴻猷金玉王度典禮增緝不有殊等何用為勸宜與一子三品仍與一子五品官更賜五百段左僕射安祿山以貞一之心愍文武之任出清北落入贊南

官既押登歌又揮寶冊與一子官賜物四百匹攝太尉張均太清宮祠及修儀注等使普恩之外又賜物一百匹武德功臣貞觀初宰輔等緬想忠義感會風雲用集大勳肇興王業其有子孫零落冠冕陵夷無仕官者宜令所司勘責依資與一入京官唐初功臣績奏締構錄勞念舊每冥于懷普恩之外宜放一子出身加已出身所司依資與一官率土之內賜醮三日

乾元元年冊皇太上皇尊號赦

古者父有天下傳歸於子子有天下尊歸於父有國所以統繼立身莫若揚親其義遠矣我太上至德道聖皇天命帝惟皇降衷敷佑于上允文允武乃聖乃神道合乎乾坤德明乎日月粵若增崇九廟巡謁五陵天子之孝也嚴禋二郊昇中東嶽聖人之表也制禮作樂闡學明刑帝皇之業也戡定多難懷柔百蠻霸王之功也於是乎為而不宰我成而勿居神超象外之先心契合漢之境釋負于小子俾承于丕構討伐叛逆綏懷四方豈朕之能皆聖皇之訓也頃者親授寶符載錫美稱頌朕不德何以克荷君父之命若登于天祖宗之緒恐墜于地一昨與群公百寮庶



尹衆士罔惟帝載欽若聖謩自古已未百王垂範文明濟哲孝友寬仁豈有如我開元之盛也乃稽大典上徽号曰太上至道聖皇天帝累日誠請不蒙許納至于數四今茲俯從允膺大休克副人望朕迫嚴旨曲被保私迎春之初承奉嘉命聖皇所賜日光天文武大聖孝感皇帝名以制義亦為寔賓卑不踰尊是昭物則恭惟聖造何敢當仁初以洪業載昌有虧公議復以大聖二字深潛猷讓非飾詞言必形泣承順顏色而宸睠不回祗膺寵光乃夕惕增勵今惟新景命禮洽於尊親誕受徽章訖在於順上發生万物行慶其時孚佑兆人緩刑斯在宜弘霈澤以布陽和大赦天下改至德三載為乾元元年自二月五日已前大辟已下罪無輕重常赦所不免者咸赦除之其兩京文武官應三司光推勘者本罪中逆減一等處分其合放者三司具條件奏聞自開元已來將相大臣非反逆及犯名教枉法贓者罪流死許其家人以禮收葬其陷在賊境為其殺戮未經追贈者據本官追贈公主非郡主嗣王郡主縣及皇王等已上親被逆賊殺害者各與子孫一人官使瘞藏失骸骨者令招魂葬身歿王事者三品已上各與追贈仍各與一子官五品已上一子出身六品已下量事

追贈其元從聖皇天帝至成都府文武官五品已下宜與一子官六品已下超資進改聖皇至成都府後到官及靈州寧州首未扈從三品已上與一子官五品已上放一子出身情願迴授周親及近親者亦聽六品已下量與轉改鳳翔府已歸順前者普恩外加一階車駕出城後任官潛藏不仕逆賊即與處分唐元功臣普恩外賜爵一級身亡歿者與子孫一人加一階其諸道節度下將士三品已上與一子官六品已上放一子出身六品已下量與改轉勳業高者各委本使奏聞諸道留後將仕普恩外賜勳三轉自開元已來宰輔之家不為逆賊所汚者與子一人官自賊陷兩京文武常參官及諸州刺史有絕脰仰藥不登叛人為衆所知者量加優贈有脫身賊庭妻子被屠戮者委所在勘會聞奏其天下孝義門各與一子官委採訪使具名聞奏量文武處分其左降官非及逆緣坐及紀惡逆名教枉法強盜賊如有親年八十已上及疾患在床枕者不堪扶持更無兄弟者許其停官終養其流人亦准此自今已後應以鑿術八仕者同明法例處分其天下百姓今年租庸並放免其百司及府縣諸色祿供各宜減半其祿役非切要者一切並停其天下州縣有遭逆賊攻擊堅守不下竟以獲全其官人百姓中有誠効灼



然為衆所知者宜令本道使按驗奏聞據狀追酬其官賞身亡歿者重  
加褒贈有父母存者仍與一官及邑号無父母者與一子官有一家丁壯盡  
被屠害者其父母妻子仍令州縣以官物賑恤并量造屋宇使得安存其  
州因城陷被殺戮者殘毀者委本道使勘責取定谷量免其三二年租  
賦自寇逆已未有匹夫匹婦節義可稱者並旌表其閭墓其泐亡戶  
復業者委本道使與刺史勾當賑給并與種子犂牛仍免三年租賦內  
外文武官三品已上各賜爵一級四品已上及四方通表使各加一階五品  
已上有父沒者各賜勲兩轉其刺史上佐錄事參軍縣令委中書門下  
速於諸色人中精加訪擇補擬判司丞已下宜令所由先於兩京皆潛藏  
不事逆賊及故託疾病官中簡擇資考深才堪者詮注續發遣皇等已  
上親及九廟子孫有才學改理委宗正寺簡擇聞薦其有任偽官及  
掌立馬軍將能即來還各還本官仍別優當其左降官諸色流移配  
隸安置罰鎮効力之類亡官失爵解退殿放歸田里及安祿山支黨  
緣坐不在免限李林甫王鉞楊國忠等一房去年十二月十五日制  
後所犯並准前制處分

廣德元年冊尊號赦

惟高祖太宗敷大德于天下覆載之內湛恩茂育累聖同道康兆人寶  
位重光深其德澤被服清漸洽于生靈百有五十年之間其不作而刑將  
措矣自寇虐橫厲山東不開壘起渠魁毒流區宇三軍七卒之士豪  
傑忠良之徒制在風波遭其駭劫由是干戈不息征 寔煩哀我人  
斯並罹灾患憫茲有犯無罪万方朕上戴皇天下臨黔首奉先聖之  
成命集一切之大勳元惡既誅群生思又是欲鏡清六合網決八紘庶  
齊大道之時克復太平之理至化猶鬱兵嚴初解百辟卿士中外重臣並  
進昌言請上徽号曰寶應元聖文武孝皇帝朕涉道日寡慙德良多恐阻  
樂推之心自增神器之重俯膺典冊敬受鴻名便欲謁報昊天展事郊廟  
又以孟秋多稼垂及西域王畿之間人實勞止軺茲大禮或候玄冬切為  
踰年改元之制續承鴻業敢廢舊章博採群公之議乃貞叶用之紀  
其實應二年改為廣德元年爰屬履端乃弘肆膏救以湯水俾雲行  
而雨施滌其瑕穢將玉振而金聲宜廣更始之恩用明嚮勸之福可  
大赦天下自廣德元年七月十一日昧爽已前大辟罪已下輕重已發覺



未發覺已結正未結正見繫囚徒常赦所不免者咸赦除之左降官即量移近處亡官失爵各與收叙諸色流入罰鎮効力安置配隸等一切放還其安祿山史朝義親族應在諸道一切原免並無所問天下所有諸色結聚差渾党項等但能悔過自陳各歸生業一切並捨其罪其中所有頭首能勸率并束乎來者並加官賞仍令本道防禦使本管刺史縣令分明曉諭所有到者各錄奏諸道百姓逋租懸調及一切欠負官物等自寶應元年十二月三十日已前並放免一戶之中有三丁放一丁庸調地稅依舊每畝稅二升天下男子宜二十五成丁五十五入老應徵租稅刺史縣令等據見在戶徵科其逃亡死絕者不得虛擲隣保河北百姓復三年應是迴紇行營經歷處免今年租稅内外文武三品已上賜爵一級四品已下加一階各賜勳兩轉天下兵馬元帥雍王智謀夙成忠孝純至恭行討伐親終元戎撫外蓄以仁訓群帥以義班師猷復勳茂武成宜兼尚書令加實封二千戶迴紇可汗冊為頓咄登密施舍俱錄英義英義建功毗伽可汗可敦冊為婆墨光親麗華毗伽可敦可汗可敦及左右殺内外宰相已下共加實封二万户令御

史大夫王相持節就銜帳禮冊左右殺胡祿都督並封為王諸都督並封國公河北副元帥懷恩宜兼太保仍與一子三品官一子四品官并階更加實封五百戶河南副元帥光弼與一子三品官并階加實封三百戶幽州節度懷仙與一子三品官并階加實封二百戶李抱玉郭英義辛雲京侯希逸田神功孫志直白孝德令狐彰並各與一子三品官并階加實封二百戶寶臣薛嵩田承嗣張獻誠等各與一子五品官并階加實封二百戶魚朝恩寄崇師律程元振勳高佐命各加實封二百戶仍與一子五品官并階僕固賜高彥崇渾白進李建義李光逸楊崇光李懷光張如岳白元光温如雅拓拔澄泌高暉盧欽友成惟良曹楚玉等各與一子五品官加實封一百戶仍各賜鐵券以名藏太廟畫像於凌烟之閣并寇難已來將相勳業高者其名藉圖畫亦准此子儀與一子四品官并階加實封二百戶晋卿劉晏裴遵慶元載各與一子四品官并階加實封一百戶儀王及彰王已下男未有官者並准舊例與官及封永穆等長樂已下長公及郡縣主嗣主等各與一子官皇親五品已上諸親三等已上各與一子出身二王後各與一子官諸道節度使



及立功將士其父兄在無官者依子文武與官已死者追贈陣亡將士  
襲父官爵河南河北有懷材抱器安貞守節素在立國不仕為衆所知  
委所在官長具名聞薦應授為官等已昭洗務才宥過宜有甄收委  
所由勘會本官名銜資歷聞奏量才處分文武正員常奉官并諸州  
刺史父母無官邑号者宜與致仕官及邑号贈者更與改贈刺史縣令  
已後改轉刺史三年為限縣令四年為限員外及攝試官一切不得釐務  
諫官每月一上封事無所迴避河圮偽度僧尼道士女冠並與改正度天下  
刑獄洎大理正斷刑部詳覆不即中書門下便即處分諸色人中有孝  
悌力田經術通博文詞雅麗雅政理優長本州各以名薦

唐大詔令集卷第九



